

清所諭意撫之廼復定源清爲書召振疑其不來
疏請逮振詔獄振詣幕府自明因言亂黨就逮且
盡可無煩兵不許振發憤自殺明日兵至城下大
肆殺掠城外橫屍枕藉五堡遺孽遂相糾集開門
迎戰殺遊擊曹安等數十人官軍亦斬獲八十餘
人攻四關廂據之晝夜圍擊亂卒出前叅將黃鎮
指揮馬昇楊麟於獄奉以爲將永築塞城門決水
灌城倣與鎮國將軍俊櫬等諭止之不聽俊櫬出
見永請緩兵亦不聽永因揚言大同欲奉一王子